

La SRG SSR realisescha mesiras da spargn

■ (cp) La direziun SSR ha discutà intensivamain las propostas dal personal e dal sindicat svizzer dals meds da massa (SSM) davart il program da spargn planisà. Pliras propostas duain vegnir tematisadas u svilupadas vinavant. Lur dimensiun na permetta dentant nagina reduziun essenziala da la reduziun prevesida da var 250 plazzas. Collavuraturas e collavuratur ch'èn pertutgads da la reduziun da plazzas pon quintar cun in plan social fair.

Suenter l'annunzia da las mesiras da spargn en l'autezza da 40 milliuns francs ad onn han collavuraturas e collavuratur da la SSR sco er il sindicat SSM pudì inoltrar – en il rom dal process da consultaziun – propostas co che la reduziun da plazzas pudess vegnir evitada u sminuida e co ch'ins pudess mitigiar las consequenzas.

La direziun SSR è sa fatschentada intensivamain cun las propostas inoltradas. Pliras propostas vegnan prendidas si ubain svilupadas vinavant. Las mesiras decididas ussa na permettann dentant a curta vista nagina sminuziun essenziala da la reduziun da var 250 plazzas. La realisaziun da singulas propostas fiss colliada cun gronds custs u perfin cun custs supplementars. Autras propostas cuntegnan in potenzial da spargn memia malsegir. Er è la SSR liada vi da contracts currents e sto ademplir obligaziuns dal

dretg da lavur. Plinavant ston las mesiras da spargn avair in effect immediat per evitar deficits a partir dal 2016.

La direziun ha perquai decidì dad effectuar la reduziun da plazzas en la dimensiun annunziada. Tar la SSR ed il tpc crodan davent var 250 plazzas. Raddund 190 da quellas en furma da pensiunaments anticipads, desditgas e reduziuns da pensum e var 60 entras betg occupar plazzas vacantas.

Bloccà las pajas il 2016 e contractà in plan social fair

Per limitar la reduziun a maximalmain 250 plazzas èn la SSR ed il SSM sa cunveggnids per il 2016 ad ina runda da nulla tar las tractativas da paja. La SSR ed il tpc èn plinavant sa cunveggnids ensemble cun il SSM e l'Associaziun dal cader (ADC) ad in nov e fair plan social. El vala per collavuraturas e collavuratur da la SSR e dal tpc che han in contract da lavur illimità e che sto ord motivs economics ed organisatorics vegnir adattà ubain schlià. Il plan social va en vigur immediat e vala enfin ils 31 da december 2018.

Las mesiras da spargn vegnan realisadas a partir dal november 2015. En il decurs dals proxims dis communiteg-schan ed infurmeschan las unitads d'interpresa davart la realisaziun da las mesiras.